

Sa Crésia de Santa Teresa de Àvila

In Gésturi, in su tzentru istóricu de sa bidda a is peis de sa prenedda de sa Giara, unu logu aundi sa genti ddoi at bíviu giai de s'época nuràgica, s'agatat sa crésia dedicada a Santa Teresa de Àvila.

S'edifitziu ddu iant fraigau in su XVI séculu asuba de una crésia prus antiga, si-ghendi formas chi torrante a su períodu tardu-góticu. Giai luegus, sa pranta originària dda iant mudada e ammanniada, aciungendi su presbitériu cuadrangulari cun sa bóvida a ingruxeri istedda e ogus pendi pendi, aundi si podit biri sa data de su 1607.

Is duus séculus a pustis, ant ammanniau sa navada, e ddoi ant aciuntu cin-
cu capellas a is alas; donniuna de cus-
tas tenit una bóvida a carrada e s'acapiat a sa navada tzentrali, custa puru

cun una bóvida a carrada, po mori de arcalis: duncas, su presbitériu oindí est totu su chi abarrat de s'istilu tardu-góticu.



In su presbitériu s'agatat s'artari de màrmuri a tres dentis, tarassiau e serrau a ingíriu de is sedilis de su coro de linna, aundi setzint is cantadoris; in is capellas a is alas ddoi at àterus altaris de linna de su XVI séculu: unu de custus est dedicau a Sant'Efis.

Su prospetu, est a narri s'afaciada, tenit sa parti de pitzus incurvada, e est pratzu in isprigus, est a narri àreas, po mori de columnas decorativas (in it. "lesena"). In s'isprigu tzentrali s'agatat su portali, cun su tímpanu curvu truncau e a dentis, aindi ant postu sa targa de candu ant cunsagrau sa crésia, in su 1743.

Acanta ddoi est su campanili, a basi cuadrada, e sa turri de s'arrelógiu, prus bàscia.

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.